

Premio promocional Santa Anna

ORANJESTAD (AAN) - DIARIO a ricibi un FAX for di Sr. A. Flanegien, coordinador di St. Annaschool cu e siguiente informacion: E premio aki a wordo insti-

tui na 1988 como un estimulo pa persona of gruponan cu a haci nan mes meritorio den of pa e comunidad di Noord.

Pues e aña aki ta di 14 aña

consecutivo cu e prestigioso premio aki lo ser otorga na ocasion di e di 15 biaha cu ta celebra Dia di Himno y Bandera na St. Annaschool.

Tur persona, grupo of instancia di Noord ta bin na remarca pa ricibi e premio aki, cual ta bai acompaña pa un suma di placa.

E Premio Promocional aki a haña e nomber di Santa Anna, como cu Santa Anna ta Patrona di Pariokia di Noord.

E promer aña e premio a bai pa Sr. Higinio (Patan) Farro, conocido musico y compositor, kende ta domina e arte di traha cilindro di caha di orgel y tambe tabata tin su meritonan den hisamento di peso.

E segundo aña e premio a bai pa Sr. Matheo Hayde (q.e.p.d.), un pintor autodidactico di Noord conoci na henter Aruba. E tercer aña e premio a bai pa Sra. Imelda Eckmeyer, fundadora y e motor incansable tras di e conocido Carnaval di Mucha na Noord y un persona cu ta move hopi riba tereno social.

E di cuatro premio a wordo otorga na e Creche Chikitin Bin Bin di Centro di Bario Noord pa nan trabao educativo y social den e Pueblo di Noord, mientras cu e di cinco premio a bay pa Sra. Filomena Tromp pa su trabao valioso tanto pa e hubentud como pa e grandinan di Noord.

E sexto premiacion a bay pa e Soeurnan di Imeldahof pa nan trabaonan inmenso pa enseñanza na Noord y pa nan trabaonan pa henter comunidad di Aruba den cuidado di mucha.

Septimo premio a bay pa Sr. Martin Ruiz, kende pa añanan largo a duna guia na Verkenneren di Noord y awor ta dirigi Verkennerij di Aruba como Hoofdkwartier-

Commissaris.

E octavo premio a bay pa Sra. Stefania (Titi) Tromp pa su gran labor cu el a desplega tanto socialmente como culturalmente y tambe riba tereno di deporte na Noord en especial, pero tambe pa henter Aruba, mientras cu e noveno premio a bay pa e Coro Santa Anna pa nan presentacionnan cultural y religioso.

E decimo premio a bay pa Sr. Thomas Tromp (Mommy), kende ta Presidente di e Asociacion di Mayornan cu tin un yiu cu un inhabilidad (Sonrisa) y kende tambe a traha duro riba tereno social y deportivo pa C.B.N. y C.C.N.

Y e di diesun premio a bay pa Sr. Ovito Tromp pa su trabao incansable pa Centro di Bario Noord, pa Chikitin Bin Bin, pa Little League en general y pa Oranje Vereniging.

E di diesdos premio a bay pa Pastoor Boks pa su trayectoria y trabaonan riba tereno social, cultural y humanitario y como guia spiritual.

Y por ultimo e di 13 premio a bay pa Sra. Canisia Scharbaay -Figaroa como muestra di aprecio pa su trabaonan incansable den ramo di educacion, tanto como maestra como lider di actividadnan social-recreativo.

Pa medio di esaki nos kier a informa cu tur hende tin oportunidad atrobe pa manda nan proposicion aden, expresando kende nan ta kere merece e Premio Promocional Santa Anna den 2001.

Por ripiti proposicion cu a ser manda aden caba durante e añanan anterior. Un suplica ta bay pa entrega e proposicionnan por escrito no mas tarda cu Diabierna 2 di Maart na St. Annaschool, acompaña pa un descripcion

motiva, splicando con a yega na tal proposicion (curriculum vitae).

Manera tur aña nos ta spera di ricibi hopi reaccion. Danki na DIARIO pa boso cooperacion acostumbra y tan aprecia.